

Ontmoeting 6

Die eerste gemeente

Kinders leer die resep vir h Gelukkige Gemeente

Die eerste gemeente het getuig, in huise bymekaargekom en wonderwerke beleef.

In hierdie ontmoeting gaan kinders ontdek dat die beginsels van die eerste gelowiges se lewenswandel en byeenkomste steeds vandag toegepas kan word, alhoewel ons in ander omstandighede lewe.

Teks: Handeling 2: 42; 44–47

Hulpmiddels:

- Ballonne met die 6 G-woorde op:
(GEDEEL / GESORG / GEËET (OF GEKUIER) / GELEER (Bybel) / GESING / GEBID)
- h Koekie om te deel (soos h Oreó)
- Bestanddele vir koek bak (of enige ander resep). Elke bestanddeel moet ook h nuwe etiket hê, bv. meel word “bid” en suiker word “lofprys”. Daar moet h paar bestanddele wees wat nie pas nie, bv. peper, asyn of tamatiesous wat gemerk is met ander etikette, bv. “stry”, “selfsug”, “jaloers”, ens.
- Afskrifte van die gebedsblokkie patroon
- Inkleurkryte en skêre
- Gom



Welkom

Hoë energie speletjie

Maak groepies van... (noem h getal)

2de opsie: Vind almal met dieselfde (geboortemaand / geliefkoosde kleur / dier / skoengrootte / soort tandepasta, ens.)

Toepassing: Daar is altyd iets wat ons in gemeen het in enige groep. As ons moeite doen, kan ons mekaar beter leer ken.

Rustige speletjie

Die onmoontlike deel: Deel 1 koekie regverdig tussen ongeveer 8 kinders.

Toepassing: Dit is moeilik om te deel as daar min is. Dit verg samewerking, mededeelsaamheid en h goeie gesindheid.



Wyding

Stilword-ritueel: Die kinders maak hul oë toe. Elkeen maak soos h wind wat waai. Maak nou die geluid al sagter totdat dit doodstil is. Maak jou oë toe en sien in jou gedagtes h prentjie waar jy saam met Jesus loop. Voel hoe die wind saggies deur jou hare waai en hoor hoe die blare van die bome ritsel. Hou Jesus se hand vas en kyk vir Hom. Jy kan vir Hom enigiets vra of vertel wat jy wil.



Woord

Wie van julle het al kos gemaak of iets gebak? (*Kry terugvoer.*) Wie het jou geleer? (*Kry terugvoer.*)

Vandag op die televisie is daar baie programme waarin mense vir jou wys hoe om te kook of bak of waar hulle h kompetisie het oor kosmaak. Kan julle dink aan voorbeelde? (*Masterchef, Koekedor, Braai Master*)

Of verwys na plaaslike kosmaak kompetisies of h ouma met h wenresep, ens. (*Vra uit en kry deelname.*) Kom ons bak h koek saam...

Gebruik goeie bestanddele, bv. meel, suiker, eiers, kakao, melk.

Gooi dan “verkeerde” goed by soos tamatiesous, asyn en peper.

As die kinders jou reghelp, voeg dan net weer h bietjie suiker by om dit “reg” te maak.

Kry kinders om te kom proe.

Maak die punt dat die regte bestanddele nodig is vir die koek om lekker te proe. NET SO is die regte bestanddele nodig vir h gemeente of groep gelowiges om te groei en om h verskil te maak.

(Beklemtoon nou al die “G’s” as jy praat.) Hierdie week gaan ons luister na die verhaal van die eerste **Gelowiges** wat h **Gemeente** **Gevorm** het. Hulle het **Geglo** en daarom ook anders **Geleef** en ons kan by hulle leer.

Julle het nou **Gehoor** ek **Gebruik** baie **G’s**. Dit is omdat die 6 G’s ons vandag gaan help om die storie van die eerste gemeente te vertel en te onthou.

Lees die teks in die linkerkantse kolom: Handeling 2:42, 44-47. (Ons laat vers 43 uit.)

Hoe sou die moderne weergawe van hierdie teks lees vir h gewone familie of gemeente vandag? Miskien so... (Lees nou die regterkantse kolom in kursief gedruk.)

42	Hulle het hulle heelhartig toegelê op die leer van die apostels en die onderlinge verbondenheid, die gemeenskaplike maaltyd en die gebede .	<i>Hulle was mal oor die Bybel, hulle het Bybelstories saam gelees en dit het hulle geleer om die regte dinge te doen. Hulle het nagmaal gebruik en vir mekaar gebid.</i>
44	Al die gelowiges was eensgesind en het alles met mekaar gedeel .	<i>Hulle het nie gestry nie, hulle was gaaf en het wat hulle gehad het met mekaar gedeel.</i>
45	Hulle het hulle grond en besittings verkoop en die geld aan almal uitgedeel volgens elkeen se behoefte.	<i>Die wat baie gehad het, het gesorg vir die wat min gehad het.</i>
46	Hulle het almal elke dag getrou by die tempel bymekaargekom, van huis tot huis die gemeenskaplike maaltyd gehou, hulle kos met blydschap en in alle eenvoud geëet	<i>Hulle het kerk toe gegaan, hulle het ander mense na hulle huise toe genooi, hulle was gasvry en hulle het saam geëet.</i>
47	en God geprys . Die hele volk was hulle goedgesind. En die Here het elke dag mense wat gered word, by die gemeente gevoeg.	<i>Hulle het Jesus liedjies gesing. Ander mense het gesien hoe hulle geleef het en daarvan gehou. Die Here het nog mense deel van hulle groep/gemeente gemaak.</i>

Hierdie verhaal herinner ons daaraan dat om h gemeente of groep te wees wat omgee vir mekaar, ons die regte bestanddele moet gebruik. Net soos met koekbak, is daar goeie en slegte bestanddele.

- Meel – om te deel en gaaf te wees
- Suiker – om Bybel te lees
- Eiers – om vir ander te sorg
- Kakao – om te bid

- Melk – om saam te kuier of saam te eet
- Bakpoeier – om te sing (lofprysing)
- Peper – om te stry of lelik te wees (boelie en name noem)
- Asyn – om suinig en selfsugtig te wees
- Tamatiesous – om te weier om kerk toe te gaan of te bid

Geheue aktiwiteit met ballonne

Wys na die 6 ballonne met die woorde op:

- GEDEEL
- GESORG
- GEËET en GEKUIER
- GELEER (Bybel)
- GESING
- GEBID

Die woorde op die ballonne word geleer en dan word die ballonne een vir een gebars in enige volgorde. (Almal moet dan help onthou wat daardie woorde was. Hulle kan dit ook met aksies onthou wat jy vir hulle leer.)

Dis die GEES wat ons help met die G' s!

Die kinders kry tyd om oor die verhaal te dink:

1. Ek wonder watter deel van die verhaal dink jy is die belangrikste.
2. Ek wonder hoe jy sou voel om deel te wees van die eerste gemeente.
3. Ek wonder of jy gasvry is as mense vir jou kom kuier.



Werskaf

- **Gebedsblokkie:** Kopieer die gebedsblokkie op karton vir elke kind. Knip dit vooraf uit op die buitelyne en vou op die binneste lyne. Laat die kinders die prente inkleur. Maak elke blokkie klaar deur die flappies aan die boksie se binnekant vas te plak. Laat die kinders speel deur die gebedsblokkie te gooi soos h' dobbelsteen. Die prentjie wat bo land, is die onderwerp. Bespreek die onderwerp met die vraag: Hoe kan jy gaaf wees... (bv. by die skool, vir arm mense, ens.)
- **Gebedsmoment:** Daarna kan daar met die gebedsblokkie as hulpmiddel gebid word. Gooi die gebedsblokkie en bid dan oor die prentjie wat bo land. Elkeen kry h' beurt.

Sluit af met die seënbede

Kinders kry geleentheid om geseën te word deur mekaar en/of die leier. Dit is altyd lekker om dit interaktief te maak!

